

EPESO OHO DZAIRA PEPA

Pauro geeteta
 Roma, Itaria
 Tii 62
 Ai Tatauma Abi Samane
 Epeso Nagapa,
 Asia Gattiqa ma Haba Qesa

¹ Dzoobe Dzairamane:

Ohonga hiiremi ana Pauroi Dzesu Kiristuho
 Qaru abi naate ooqi nagapa Epeso ma qesai nooka
 hisi eetoraiho abi nikeho quba noorake qeete.

² Oonita Ohonga Mai ma Soopara Dzesu Kiristui
 hasu ma keba nikeho irita dzoobiremi oorai.

KIRISTUI AGOAGO NAPAHOHO KHOOBANI-PAMU

³ Qate Dzesu Kiristu Soopara napameho Mai ma
 Ohongai ao qusu tete samanenipamuta napake
 Sumasaho isakima qanoqanonomaitemi ooraita
 dzapa nohoio poro kiranomani!

⁴ Agobanipamuke noi ttoka ma habaho husi ma
 pai mootaamake ooqi napai noho pengata saasari
 naate noomaeho pobi naatakoiqi napake noi ango
 bosata asateta.

⁵ Noi dzasa nomeho quba eeteqi Dzesu Kiris-
 tuho botota napake khameto hiibakoiqi hiireta.
 Oi teeho bahe noomaeho dza hiiremi tete oke
 Ohonga biraiteta.

⁶ Noi qeseba khata nome qaanataranihe noke
 napaho quba ai mootota oho qubake baruna

heena nohoke napa nookami dzapanomanipamu,
hasa hiaroraquho isaki!

⁷ Oonita khatai baatetaho dzuui napaho ttuma
naatemi napai kahosaho dzore naate oorai ooqata
baruna heena ttunoma nohoi paana naatorai.

⁸⁻⁹ Oi noi nokanoka ma gesina nometa baura
eeteqi iiha dzoobireqi ttitti ma bapo saridzeta.

Saridzeqi dza nometa adzahaha naate poiqa
oke napaho quba paanaitorai.

¹⁰ Quba apeke paanaitorai bahe Kiristui qusu
ma ttoka ma haba minaraho qibnipamuke
naatemi totaqi ma totaqina oorai napai gama
noho oko ma boto naatoraridzoni.

¹¹ Oi iiha ma dzoobidzata Ohongai tete bi-
raitemi oi tatanganita Dzesu Kiristu ao baura
nome eetetaho qubake Ohongai napake asatemi
sapara naataquho isaki ooraama.

¹² Bamu, oi napai ao bosata Kiristuho qupa
toobake eeteta oho isakita napa paha noho
hasama gegema hiire qaarakoi.

¹³ Oi nikeke qidzaitarotaho sinabidzake nike
nookaqi hisi eetemi oionita Qaheuba Sumasai
baabakoiqi hirota noi ao baaqi nike ma napake
ttanga mootomi oorai.

¹⁴ Oonita ttanga mootoqi noi napake tuuhoro
qaamake Kiristu ao napaho quba ttuma eete-
taho meeke napai qusuho pobi gama mai eete
soubidzakoi. Oke napai qupadzomaqi Ohongaho
subesube hiire qaarare.

15 Oonita nike Soopara Dzesu nooka hisi eeteqi abi samane Ohongaho pobi naatareiqi ao dzasa eete baura eetoraipo pobike ana nookorai.

16 Nookaqi Ohongaho hasa hiireqi nikoho dzapake pupu nameta cupi samaneke hiarorai.

17 Pupu hiireqi Dzesu Kiristu Soopara napameho Ohonga ma Mai Dzadzanomai nike isakinomaitemi nike noho nokanoka ma gesina ma mohimohi ao saridzareiqi ana pupu hiarorai.

18 Oke nike saridzeqi adzahaha naate qupa nesenoma naateqa Ohongai nikoho kira hiiretaho isakita nike ao nese dzoobidzakoi. Dzoobireqa qaheuba abima ttaiqake qusuho qidza, nee ma baunoma dzapanoma oke mai eete gesina naatakoi.

19 Oi Ohongai beedzae minanipamu napaho pobi hiiremi oorai oke nike nooka hisi eeteqa ao aimakoi. Beedzae ape bahe bauraho tatangani-pamu, ooma nike baura eetakoi.

20 Oi Ohongai Kiristuke poro qerenomenaitareiqi noke tukuto aimaqi qusuho isakita mootota.

21 Mootomi abi qibani, mae soopara quesani, mae bise ma baise dzapa samane poiqa oorai mae ipina biranataqu oke Kiristui ao gama suqobidzanipamuke eete oorai.

22 Oi Ohongai quba minarake khataho pesunaiteqi noke sinabidzaho oko ma botoho qiba upubireta.

23 Oonita oko ma boto nohoio boto ma sama ma sasa ma haba noho naate ooraimi noi oke gama igabire soubirorai, uububuu!

2***NAPAI KIRISTUMA QARAQARAHO POBI NAATE OORAI***

¹ Oi agobake nike qanga ma kahosanoma ooqi baataho tomidzai qaata.

² Nike ttokaho oora ma qaarahoh tete qusubaiteqi llibadza ma songenaho bisebaisei abi basesanomaho irita ooraiho isakita nike agobake pasena eete qaata.

³ Oi nike keke bahe napai sama napameho oora ma qaara ota dzeima qaaqi dla napameke iihaqi oho qupa qanga ma iiha ma dzoobidza oberake qusubaiteqi quesai oonomake eesuqi oho ipi bamenoma saridzoraiho isakita napamae gama saridzarota.

⁴ Oonihe Ohongaho qupa kokora meupunomai oomi noi napaho quba dzasa minake eeteta.

⁵ Oonita napai koiri ma pasenaho qura tuputa oomi noi Kiristuke tukutoqi napake gama tukutomi eehaha naateta oi teeho bahe baruna heena nohoi napake ingonaitemi oorai, dzoobe!

⁶ Oi noi napake teenait tukutoqi Dzesu Kiristuke qusuho isakita poro qerenomaiteqi napake gama oho isakita mootota.

⁷ Oke eeteqi noi Dzesu Kiristuhoh teteta baruna hena meupunoma nomeho quba eeteqi qupa kokora qidza nome napake banaite qaraqara qaarakoi.

⁸ Oonita nike teqaha nikemae tete oke saridzara, bamu. Qaraqara oke nike nooka hisi eete saridzetanihe oke Ohongai noomae nikelke qonotomi saridzeta.

9 Nike teqaha oho quba baura eetaranita etoqa teei sama qusuba eetaino.

10 Oi agobanipamuke Ohongai tete qupadzomami napai Dzesu Kiristuhu boto kinisa naatemi oho isakita napa oora ma qaara qidza eetoraridzoni.

***RAABA ABI DZUTA ABIMA GAMA
KIRISTUHOTA TTAIQA NAATORAI***

11 Oonita agobake nike raaba abi qaami sama koko geebanomai nikeke hee, abi geebaamaniqi hiire qaata oke nike eto rume naataino.

12 Oi bodza ota nikel Kiristuhu dzore naate qaaqi Isiraeho ttaiq, ma naru tatanga nokoho, ma qupa tooba, ma paha Ohonganipamu, nike quba oonomaho dzore naate habanake qaata.

13 Oonihe nike ngaata qaami Kiristui baatemi noho dzuui nikeke dzeimami nika poike Dzesu Kiristuhota paana naate ooraita qupadzomo.

14 Oi nika ma napaho takurata iboho qaho teei qaatanihe Kiristui sama nome bagara biihiqi qaho oke geemata. Geemaqi noomae napaho soota naate oorai.

15 Oi qesa ma nanai hu nooho angi ma kakatita qaata oonihe oke noi uhutoqi nika ma nanai maina painake qaata napake poiqa korabetemi abi susupuho isaki qidza naatoraita napa keba ma dzapata ttaike oorare.

16 Oonita paha Ohonga ma abi napaho takurata ibo teei qaata oke gama teetareiqi Dzesui hapa-hapata sama nome sesero eetemi ibo oi ota bamu naateta.

17 Bamu naatemi nana paana qaata ma nika ngaana qaata napake noi Ohongama teenaitare

hiire hasuho isere qidza napaho irita suutomi oorai.

¹⁸ Noi ao tete kuraumami Sumasa noio napake ota dzeimami tete teena ota napa dzuubaqa Ohonga Maima gama qesa hongasire qaarare.

NAPAI OHONGAHO BIIRI ONI

¹⁹ Oonita nike bosata dzore ma aabei qaatati poiqa sinabidza abiho ttaiqa naateqi ao Ohonga noomaeho oko ma botoho isakita oorai.

²⁰ Nikeke naga nohoho isakike gootomi ooraihe too abi ma qaru abi nanai oho subani qate Dzesu Kiristu noomae oho ttittirani.

²¹ Oi napai naga Soopara napameho neta qesa hongasire qaheuba biiri gooto minaitoraiho isaki naasubi.

²² Oi Sumasai oho gosogoso abi ooqi napake ttutuite gootomi napai Ohongaho guhu ma nagapa oionita mooro.

3

PAUROI RAABA ABIHO DZEIMA NAATE BAURA EETOTA

¹ Qate nookare, ana Pauroi Dzesu Kiristuhu pobi oonihe khooba apeho qubake ana sutasutata oorai? Oi teevo bahe raaba abi nikeqaho qubani.

² Baura oke ana nikeho quba eetareiqi Ohonga baruna heena nometa oke hiiremi oorai, mae oke nike nookaama?

³ Noi noo dzukudzukuna oke anaho quba paanaiteta noo oke ana ao qibake teeteqi qeete.

⁴ Oonita Kiristui noo nomeho gesina anake moitetaho mee erake nike isaiteqake qupadzomare.

5 Noo oke noi te uimane neimaneho quba paanaite qaararanahi abiniqake too abi ma qaru abi nanake Sumasaho teteta paanaiteta.

6 Oonita sinabidza qidza oke hiire paanaitemi raaba abi totaqi ma totaqi oi Dzuta abi gama naru hihretaho mee oke napai Dzesu Kiristuhoh neta ttaiqake saridze qaarakoi.

7 Oonita Ohongai baruna heena nometa anake beedzae nome erake moitemi anai sinabidza qidza oho tuhotuho naate oorai.

8 Moorare, qaheuba oko ma boto tupu minaraho sabi qanga anaho torota Ohongai baruna heena erake moitemi oorai. Oonita abi qiri eete saridza-quho isaki bamuhe noo meupunoma Kiristuhoke ana isanate raaba abi nikeho quba paanaitemi nookare.

9 Oi Ohonga quba minara korabetetaho khoobata noi noo qesa bagenoma dzukuromi baa qaabi oke ana nikeho quba paanaisubi oonita noho ttitti ma bapo oioni.

10 Oke eeteqi anai Ohongaho nokanoka hii khara oke paanaite qaamake qaheuba oko ma boto tupu nike qusuho beedzae ma tatanga oke gama gesina naate soubidzaridzoni.

11 Oke Ohonga agobanipamuke Dzesu Kiristu Soopara napahoho teteta biranatareiqi ttibeteta.

12 Oi Kiristui tete kuraumami ooraita napa qupa too teeteqi paidzasuiqa noke ai tataumaqi ao qeemare.

13 Oonita nookare, anai kaipo eranoma saridzemi oi nikeho nee ma bau naatemi eto oho quba anake gaubidzaino.

*PAUROI PUPU BAURA NOMEHO KHOOBA
PAANAITETA*

¹⁴⁻¹⁶ Oonita ttokaho ttarini, mae qusuho ttari oho mai ape bahe Ohonga teena. Oho qubake anai penga nohota pomai kotoroqi pupu erake hiiorai. Hee, O Dzapa pobi minanomanipamu, nii isanate Sumasa niimema oko ma boto tupu niimeke qanoqanonomaitemi nokoho qupa khatai beedzaema oorare.

¹⁷ O Kiristu, noko niike nooka hisi eesumi nii dzasa niimeho quba eeteqi nokoke teka ma isakinomaiteqa niimae nokoho bisata qopa koobire qaarare.

¹⁸⁻¹⁹ Oke eetemi O Kiristu dzasa niihoho isaki khara ma reresepe, suu ma heenoma oorai oi abihi gesina suqobidzanipamuke eetorai.

Oonihe qaheuba abi qesa niiho dzagana oorai nokoi quba oke ao mooraiho isakita nii ttokaho oko ma boto tupuma qaama noko oho qesa oho isaki gesina naate Ohonga niiho ttuu qidzata gima qaamake nokoho beedzaei hee ma heeta biranate baura samaneke dzoomakoi.

²⁰ Oonita nanai iilha ma dzoobidza nanameta quba tee ma teeho quba niiho torota pupuhibarorihe nii nanake beedzaenomaitoraiho isaki oi nanake ao suqobidzanipamuke eetorai.

²¹ Oho quba Ohonga naname, Dzesu Kiristu noi oko ma boto tupu nome nanama qaamake dzapa pobi niihoio abi ma quba gama igabire peite qaraqara qaarakoi. Oore.

4

*KIRISTUI QIBANITA NAPAI NOHO OKO MA
BOTO*

¹ Oonita ana Sooparaho quba eeteqi sutasutata ooraiho isakita nike tete qidzake iihorareiqi qupanomaisubi, oi teeho bahe nikeho dzapa ota oorai.

² Eto sama qusubanoma naatainohe pookeba samakeba naate keba ma dzapata ooqa dzasaho pomata qesa dzeimare.

³⁻⁴ Oi Sumasa teenai oko ma boto tupu nikelike teenaiteqi hasuho ekama sипитотоми оорайто ето ека оке ухутоми rasaki naataino. Oi Ohongai nikelike dzapaqi ttuba teenata giimorare hiiremi oorai.

⁵ Oi napaho Sooparai teenanita ai tatauma ma sobasoba oi paha teena.

⁶ Oho qesa napaho Ohonga mai teena noi napaho nakuta gama oorai, gama napaho irita oorai ma paha napake gama suqobire oorai.

⁷ Oonihe Kiristui abiho isaki maina paina moohiqi oho isakita baura qidza maina painake temu ma temuke moite soubirorai.

⁸ Oonita qetaqeta teehee, Kiristui pei qusuta tussuqi ibo sengibete peitetanihe paha abiho quba kamo biireta oi ooqaho quba hiireta.

⁹ Peitetaiqi hiire oi teeho bahe Dzesu bosata qurate qura tuputa ootati peiteta.

¹⁰ Oonita bosata quratetai ape bahe ipita quba minarake suqobidzanipamuho isakita peiteta teenanita oke eesuqi quba minarake noi ao igabirorai.

¹¹ Oonita peiteqi Kiristui bauraho kamo biireqi quesake noi too abi ooniqi hiirorai, quesake qaru abiqi hiirorai, quesake sinabidza hibahibaho abiqi hiirorai, quesake oko ma boto tupuho sooparaiqi hiirorai ma paha quesake banaitaniqi hiirorai.

¹² Oke noi teeho quba hiibaranihe nokoi oko ma boto tupuke tuuhoro qaamake bitotoqa isaki nokome saridzeqa sinabidzaho abi tupu oi gama iso keke kooma tanga aimaga ooma baura eete qaarareiqi bauraho kamo oke noi biireta.

¹³ Kamo biiremi napai iso keke baura eete qaamake napaho ai tatauma ma nokanoka oi mina naatemi Ohongaho khata Kiristui qupadzomaqi hiiretaho isakita napai susupu ma kotanga naataquni mae?

¹⁴ Oi napai puqi poonomaho qesa naate sin-abidzaho somebasome, abi oberaho baabe ma basarani, mae angi ma kakati, oonomaho isakita poupa eete baa qaariti poiqa napai kotanga naateqa gurimo biire qaarare.

¹⁵ Oonita nike noo meeqake keke hiire dzasaho teteke iihaqi bitotoqa etoqa Kiristuho poma tee-qake riitainohe erake qupadzomare, noio napaho qibani.

¹⁶ Oke qupadzomaqi noho torota ipibiremi rubabangi napahoi tatanga naatemi noi napake suutomi gotta ma sama napahoi noho isakinipamu naatare. Oi napai noho qetta ma koko naateqi beedzae nohoma kokora baura oke meke-qoma eete qaaqa meeke ooqata gurimo biidzakoi.

AI TATAUMANOMAI QUPI BAHE DZADZAHOTETE IIHAKOI

¹⁷ Oonita Soopara napameho pengata ana noorake nike pobi hiire. Raaba abi qesa qupa rasaki nokometa oora ma qaara oberama eetoraiho isakike nikemae eto eetaino.

¹⁸ Nokoho qupaasuas naatemi kha qupi oi nokoho iiha ma dzoobidzake sengibetemi nokoi

Ohongaho qaraqaraho dzore naatorai oi teeho quba bahe nokoi khoukhauma oorai.

¹⁹ Oi qupa nokohoi ao tete qidza siiremi nokoi sama nokome pasena ma baura ngiinginoma eetorare hiireqi oke dzaodzaoma eetorai.

²⁰ Qate Kiristuhu teteke nike teqaha oonomake eete saridzara. Baamunipamu.

²¹ Nike Dzesuho noo mee saridzeta oke nike abiho toota korabete nookata, mae nike nookaama naatorai?

²² Oi nike oora ma qaara agoba nikeme pase-naho ikoikota dzeima qaata oke poiqa nookami dzahosanomanita oke gama kuibidzare.

²³ Kuibiremake qupa nikehoke Sumasai uumanji adzahahaha naatare.

²⁴ Adzahahaha naate oionita Ohongai oora ma qaara usaqe meenoma rike ma pobinoma oke nikeho quba korabetemi oorai oke nike ao mai eetemi bagenoma naatakoi.

²⁵ Oi nike ao Kiristuhu oko ma botoho ttaiqa naate ooraita temu nimema noo mee keke hiireqa obera nooke qaatanipamuке eetare.

²⁶ Nii qupa biribirinoma naataquko etoqa oho biribiriri niiho angi naatemi oberama eetainoho qubake qupi soobaamake ao hairiamake qupa niime kebaitare.

²⁷ Kebaitemi iibadzaho pui bamu ota biranataqu.

²⁸ Qate gumenomai guume qaasuhiqa beedzae nokomema ttumaho baura teeke mai eete ooma abi kaiponoma hoobire qaarare.

²⁹ Etoqa noo qanga too nikehota biranatainohe abi minarake hoobidzareiqi noo qidza keke hiro-rare.

30 Nookare, nikeke ipi bodzata teka moite soubidzakoiqi Ohongaho Sumasa Qaheubanai ao nike ttanga eetemi ooraita eetoqa noke basesa eetaino.

31 Iboho noo, ttire ma dzauba, sokasoka ma garugaru oke gama hee, qanganiqi hiireqa tume biidzare.

32 Ohongai Kiristuho quba eeteqi kahosa nike-hoke qaatetanita nike oho qesa adzahaha naate abiho dzasa eeteqa qesaho kahosa ao gaubiremi bamu naatare, tete oke qupadzomare.

5

NAPAHO TETEI KOINA QIDZAHO ISAKI NAATARE

1 Nike qeseba Khametoho isakita Ohonga mai nikeme suima qaarare.

2 Kiristui nikeho dzasake eeteqi sama nome napaho quba ai mootomi Ohonga nookami kiridza ma qonoqono qidza ura moromoronomaho isaki naateta. Oho qubake nikemae dzasaho tete oke paha ipibidzare.

3 Oi nikei qaheubananita guume ma meera, peetta ma qeraqera ma quba ngiinginoma etoqa quba oonomaho dzapa hiibainonipamu.

4 Quseripoho noo ma noo sepesape ma qepuqepu quba oi meeamanuhe Ohongaho subesube hiibaqu oio isanatakoi.

5 Nike noorake qupadzomare. Pasenaho too ma guume ma meeraho nese herohero abi oonomai bamu Ohonga ma Dzesu Kiristuho pobi naataqu oho tete bamu.

⁶ Ohongaho purabai basesanomaho irita qeemoraita etoqa abiho ikoiko noo sepeke nookami meenoma naataino.

⁷ Etoqa oho ttaiqa naataino.

⁸ Oi agobake nike kha qupita qaatahe Soopara napameho neta ao dzadzaho pobi naatoraita oho koinata oora ma qaara nikeme eetorare.

⁹ Oi dzadzaho isaki oi quba ape bahe rike ma pobi ma tete mee ooqai ooni.

¹⁰ Tete oonomake iiha qaamake Soopara naphoi nookami bagenoma naatakoi.

¹¹ Qate quesai qupiho baura meeama qere biire oorai eto nokoho ttaiqa naataino, baamu. Nokoke paata oho qaga hiibare.

¹² Noko dzukudzukuta eetorai oho dzapake qidzoke hiibaqu oi midzanomanipamu.

¹³ Oonihe quba oonomaho khooba sigumami ao paana naatakoi.

¹⁴ Oi dzadzai meeke quba samane minarake baiburomi paana naataridzoni. Ooqaho quba qetaqeta tee hee, Meeqoraidzo? Kiristui nii baiburomi dzadzanoma naatakoita ao baata neta qoridzare!

¹⁵ Oiqi hiiroraita nike ruume qaasuhiqa tete qupadzomaqi oora ma qaara nikeme bakena geema qaarare.

¹⁶ Poiqa bodzarata abi samanei sama nokomeho kakati eetoraita etoqa bodza nikeme sesero eetaino.

¹⁷ Oonita eto quseripo naatainohe Sooparaho dza teena oke qupadzomaqi qusubaitorare.

¹⁸ Oi oba tatanga ma qubai nikeke suqobidzakoita eto oho beedzae eetainohe

Sumasai nike suqobire qaama nikeho beedzae ooqata biranatare.

¹⁹ Nike qupa nikeme too teeteqi husu ma huhuru, ma hasa naa qesa oke kuima hiire teenaitare. Qupa qidzaqidzaho isakita Sooparaho dzapake qiraitemi sinabidzahotaasuas bagenoma naatakoi.

²⁰ Oonita nike quba naane ma naaneke saridzaqu saridzeqa Soopara napame Dzesu Kiristuho quba eeteqi Ohonga maiho hasama gegema hiire qaarare.

²¹ Oi nike Kiristuho attiuboubota ooqa qesaqe-saho dzapa qusubaite qaarakoi.

APU MA ATAHOO NOO QIDZA

²² Qate atamane nike Soopara qusubaitareiqa apumane nikemeho noo qusubaite qaarare.

²³ Nookare, Kiristui oko ma boto tupu nomeho qiba naate napake ingonaitorai. Oho isakita abi noi paha atapaho qiba naate noke ingonaitaridzoni.

²⁴ Oho qubake Kiristuho oko ma botoi noho too qusubaitoraiho qesake atamane nikel quba samanehota apumane nikemeho too qusubaitare.

²⁵ Qate Kiristui oko ma boto nomeho dzasa mina eeteqi sama nome napaho quba ai moototaho isakita apumane nike oho qesa atamane nikemeho dzasa eete qaarare.

²⁶ Oi Kiristui dzasa eeteqi oko ma boto tupu nohoi sasari naate noomaeho pobi qidza naatareiqa noi sinabidza noota akoako baura eeteta.

²⁷ Oi oko ma boto nohoi oba qoroqa dzoko ma qunupu ma qubaho amake ooqa nee ma

baunoma keke naatemi napake dzaga nomenipamuta mootareiqi noi oho baura eeteta.

²⁸ Oho qesa apumane sama nikemeke kokora eetoraiho isakita nikei atamane nikemeke kokora eetaridzonita erake qupadzomare. Teei ata nomeho kokora eesuqa sama nomenipamuke kokora eetakoi.

²⁹ Oi abi teei sama nomeho gottaenipamu eetoraidzarani. Bamu, Kiristui oko ma boto tupu nomeho quba dzasa eeteqi korabetetaho isakike abi paha sama nome ma nomeke korabedorai.

³⁰ Oonita napai Kiristuho oko ma botoho qesa ma koko oke qupadzomaqi nokoke hoobidzare.

³¹ Oi erake eete oorai. Abi teei mai ma pai qaataqu oi teeho bahe noi ata nomeho torota atimareiqi nopoqee qaatakoi. Qaateqa ata ma nopo esese sama teenai oorakoi.

³² Noo ana hiibi oho nebe totaqi oi qahuranihe oi Kiristu ma oko ma boto nohoho noo bagenomanita qupadzomare.

³³ Oonihe meeke apumane nookare. Nii sama niimeke korabedoraiho isakita ata niimeke kokora qidza eete noke ingonaite qaarare. Qate atahoke ao hiire, noi meenipamuke apu nomeho pesuta bageke eete qaarare.

6

MAIMANE PAIMANE MA KHAMETOHO SINASINA

¹ Khameto nike Dzesu Sooparake qupadzomaqi mai ma paiho noo qusubaitare, tete oio bagenoma. Hu noohota poma teei hee,

² Mai ma paiho dzapa qusubaitareiqi hiirorai noo oi paha ipi ma arinoma.

³ Oonita khameto nike noo oke qusubaite tumaqa nike ttokata qaaraquta oora ma qaara qidza khara oke saridzakoiqi hiiroraita qupadzomare.

⁴ Qate maimane nike eto khameto isakiamake pobitemi sama taramaino. Oonihe Sooparake qupadzomaqi khametoke qogo ma saga qidza hireqa kokora eetorare, oio tete.

BAURA ABI MA MAIMANEHO SINASINA

⁵ Qate kokora abi nike maimaneho baura tatangata oorai nike Kiristuke qupadzomaqi maimane bauraho noo hiibaqu oke ququimaqi qupa teenama iso keke eetorare.

⁶ Etoqa abiho penga quba eeteqi baura gimuttake eetainohe nike Kiristuhu kokora abi ooqi Ohongaho dzake qusubaitorare hiireqi qupa sorangaamake baura eetorare.

⁷ Nike adzahaha naateqa hee, Abiho baura bahe Ohonga Sooparahoniqi hiire eetare.

⁸ Oonita abi sutasutata oorai mae saqosaqota oorai nokoi iso keke baura qidza eete qaaqake Soopara napameho botota oho ipi ma ari paha iso keke saridzakoi.

⁹ Qateqa sama bauraho maimane nikeho noo oho qesa hiire nookare. Nikei bauraho noo noko pobi hiireqa etoqa nokoke sudzabetaino. Soopara qusunai abike idzoidzoke baatabirorai oi nokoho keke bahe nike ma napahonita qupadzomare.

QAA ABIHO ISAKITA SAMA NAPAMEKE QAA-SUMARE

10 Oionita qesamane dzairamane name, noo musaqi erake hiire nookare. Nike Sooparahota beedzae giima qaama beedzae ma tatanga nohoi nikeke isanatanipamuken eetakoi.

11 Ohonga qaandomaho isaki oke nike gama susupu mai eete soubireqake iibadzai qaa samaneke qogoimorai oke nikel kurebete arabidzakoi.

12 Oonihe nike qaa eetaqu oke bamu abiho isakita eetaqu. Bamu, qupiho gisi ma songena bise ma baisenomaho tupu qangai haba igabireqi ttoka abi qorobirorai. Isaki oonomaho qaake nike eete suqobidzareiqi ana hiibi.

13 Ooqaho qubake anai hee, Ohonga qaa minanomaho isaki oke nike tukuma soubiremi qaa ika ma ikanoma biranate nikeke sururu eetaqu oke nike qaupasasa gaamaqi oke suunaiteqa baura soubidzareiqi hiire.

14 Oonita sama nikeme qaasumaqi ao rike ma pobiho sasa tatanga dzaaroqa sinabidza noo meebo siihu qahitoto suutare.

15 Suutoqa hasu noo qidzaho oko sasake dzaabare.

16 Qate oho tongo neta nike ibo qanga nikemeho koo ma tanga gama arabidzareiqi ai tataumaho tepureke amatotare.

17 Amatotoqake ingonaitaquho qiba heroheroke dzamotoqa paha Sumasaho dzubeke boto dzoomare.

18 Oi dzube ape bahe Ohongaho noo. Oke hasa ma pupuke boto dzoomaqi qupi ma sau samaneke bakena geemaqi Sumasaho beedzaeta pupu dzoobire qaarare.

Oonihe puputa oko ma boto tupu minarake qupadzomaqi hiibare.

¹⁹ Oho qesa ana naamae bittatete too saqoro ao noo saridze sinabidza bamenoma oke paanaitareiqi pupu hiibare.

²⁰ Oi qaruho nane bosabosa anai sutasutata ooraiqi bittatete noo hiibaridzoho quba pupu hiibare.

NOO QETTA MA KOKO

²¹ Oionita anai ikanoma oorai ma baura apeke eetorai? Oho pobike nike gama nookare hiireqi sinabidzaho noma qidza tee Tikhiku, noi iso keke Ohonga Sooparaho tuhotuho naatorai, noke ana dzoobiremi nikeho torota tuume.

²² Oi ana noke dzoobireqi hee, Nookare, nanaho noo gama hiire rerengi eete nokoho qupa tta-puitare oiqi hiiremi noi tuume.

²³ Dzoobe Dzairamane, Ohonga mai ma Soopara Dzesu Kiristui nike gama nooka pobiteqi dzasa quba eeteqi hasu dzoobiremi ana nike pobi hirenita nookare.

²⁴ Noo oionita apenei Soopara Dzesu Kiristu ma qaraqara tatanga nohota atimorai meenipamuke noho baruna heena nikeho irita qaarare.

Anaio Pauro

**PORO TONGO USAQE
The New Testament in the Guhu-Samane Language of
Papua New Guinea
Nupela Testamen long tokples Guhu-Samane long
Niugini**

Copyright © 1975 Bible Society of Papua New Guinea

Language: Guhu-Samane

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 5 Apr 2025 from source files
dated 31 Aug 2023

1e8f2c8a-2e91-5f7a-8d28-7e63415f9012